



**Sud Bosne i Hercegovine**  
**Суд Босне и Херцеговине**

---

**Predmet broj: S1 2 K 031166 18 Ko**

**Datum izricanja presude: 08.03.2019. godine**

---

**PREDMET TUŽILAŠTVA BOSNE I HERCEGOVINE**  
**protiv**

**Maria Galića**

---

**PRESUDA**

---

**Branilac optuženog – Almin Dautmegović, advokat iz Zenice**

**Tužilac Tužilaštva Bosne i Hercegovine – Miroslav D. Marković**

## **U IME BOSNE I HERCEGOVINE**

Sud Bosne i Hercegovine, sudac Anđelko Marijanović, kao sudija za prethodno saslušanje, uz sudjelovanje stručnog saradnika Amele Huseinbegović, u svojstvu zapisničara, u krivičnom predmetu protiv optuženog Mario Galića, zbog kaznenog djela Porezne utaje ili prijevare iz člana 210. stav 3 u vezi sa stavom 2. Kaznenog zakona Bosne i Hercegovine (KZ BiH), povodom optužnice Tužilaštva BiH broj: T20 0 KTPO 0015907 18 od 02.11.2018. godine, potvrđene dana 07.12.2018. godine, nakon održanog pretresa za razmatranje sporazuma o priznanju krivice i ročišta za izricanje krivičnopravne sankcije, u prisustvu tužioca Tužilaštva BiH, Miroslava D. Markovića i optuženog Maria Galića, na osnovu odredbe člana 231. ZKP BiH, dana 08.03.2019. godine, donio je i javno objavio:

### **P R E S U D U**

#### **Optuženi:**

**GALIĆ MARIO**, sin Željka i Ive rođ. Martinović, rođen 04.01.1982.godine u Mostaru, stalno nastanjen u ..., ..., državljanin ..., oženjen, otac troje djece, sa završenom srednjom školom, zaposlen u poduzeću „BDM GROUP“ d.o.o. Široki Brijeg, vojsku nije služio, ne vodi se u vojnoj evidenciji, broj Osobne iskaznice ..., JMBG:...,

### **K R I V J E**

#### **Što je:**

1. u vremenu od 01.-31.08.2016. godine u Širokom Brijegu, radeći u svojstvu odgovorne osobe u poduzeću „BDM GROUP“ d.o.o. Široki Brijeg, nakon izvršene nabavke, od dobavljača UniCredit leasing d.o.o. Sarajevo putničkog automobila BMW, po računu broj:... od 31.08.2016. godine u iznosu od 161.761,70 KM, uz iznos korišćenog ulaznog PDV od 23.503,84 KM, i putničkog automobila iste marke, od istoga dobavljača, po računu broj:... od 31.08.2016.godine u iznosu od 162.375,25 KM uz iznos korišćenog ulaznog PDV 23.592,98 KM, protivno odredbama čl. 38. st. 2. Zakona o porezu na dodanu vrijednost (Sl.glasnik BiH broj:3/03 i dalje), i čl. 64. st. 1. Pravilnika o primjeni Zakona o PDV, /Sl.glasnik BiH, broj: 93/05 i dalje), izvršio odbitak ulaznog poreza u iznosu od 47.095,00 KM, oštetivši na taj način Proračun/Budžet BiH za navedenu sumu.
2. u vremenu od 01.-31.08.2016. godine, radeći u istome svojstvu kao pod tč. 1. Optužnice, nakon izvršene nabavke putničkih automobila BMW od dobavljača „Autocentar Tomić“ d.o.o. Mostar, po računima broj:1-60018 od 01.02.2016.godine, broj:1-60019 od 01.02.2016.godine na iznose predujma od 20.000,00 KM i iznos korišćenog ulaznog PDV od 2.905,98 KM, odnosno 20.000,00 KM i iznos korišćenog PDV od 2.905,98 KM, protivno odredbama čl. 38. st. 2. Zakona o porezu na dodanu vrijednost (Sl.glasnik BiH broj:3/03 i dalje), i čl. 64. st. 1. Pravilnika o primjeni Zakona o PDV, (Sl.glasnik BiH broj:93/05 i dalje), izvršio odbitak ulaznog PDV u iznosu od 5.811,00 KM i ako je dobavljač „Autocentar Tomić“ d.o.o. Mostar, stornirao avansne

račune pod brojevima:1-60019 od 11.08.2016. godine i 1-60018 od 12.08.2016.godine, na koji način je iskoristio pravo na odbitak ulaznog PDV po osnovu nabavki koje nisu realizirane, oštetivši na taj način Proračun/Budžet BiH u iznosu od 5.811,00 KM,

3. u vremenu od 01. – 31.12.2016. godine, radeći u istome svojstvu kao pod tč. 1. Optužnice, protivno članku 32. Zakona o porezu na dodanu vrijednost, (Sl.glasnik BiH broj: 3/03 i dalje), evidentirao račun dobavljača „eCARD“ d.o.o. Mostar, u ukupnom iznosu od 35.100,00 KM, koji se odnosi na navodne usluge reklamiranja poduzeća „BDM GROUP“ d.o.o. Široki Brijeg, i ako nije postojao zaključen Ugovor o poslovnoj suradnji sa poduzećem „eCARD“ d.o.o. Mostar, na koji način je iskoristio pravo na odbitak ulaznog PDV u iznosu od 5.100,00 KM, oštetivši na taj način Budžet/Proračun BiH za navedenu sumu,

**dakle**, u namjeri da ostvari pravo na povrat po osnovu indirektnih poreza propisanim poreznim zakonodavstvom BiH, podnio poreznu prijavu neistinitog sadržaja sa iskazanim iznosom za povrat indirektnih poreza koji prelazi 50.000,00 KM,

**čime je** počinio kazneno djelo Porezne utaje ili prijevare iz člana 210. stav 3. u svezi sa stavom 2. KZ BiH,

**pa mu Sud**, na osnovu članova 39., 48., 58. i 59., u vezi sa odredbama člana 49. i 50. stav 1. tačka d) KZ BiH, izriče:

### **USLOVNU OSUDU**

kojom mu se utvrđuje **kazna zatvora u trajanju od 11 (jedanaest) mjeseci** i istovremeno određuje da se ova kazna neće izvršiti ukoliko optuženi **u roku od 2 (dvije) godine** od dana pravosnažnosti presude ne počini novo kazneno djelo.

Optuženi Mario Galić se **na osnovu člana 110. i 111. KZ BiH**, obavezuje vratiti imovinsku korist pribavljenu počinjenim kaznenim djelom u iznosu od **58.006,00 KM**.

**U skladu sa odredbom člana 188. stav 1. ZKP BiH**, optuženi se obavezuje da nadoknadi troškove krivičnog postupka, a koji se sastoje od troškova Tužilaštva u iznosu od 480,00 KM i sudskog paušala u iznosu od 100,00 KM, u roku od 30 (trideset) dana od dana pravosnažnosti ove presude.

### ***O b r a z l o Ź e n j e***

#### **Optužba i sporazum o priznanju krivnje**

Tužilaštvo BiH je dana 02.11.2018. godine, podiglo optužnicu broj T20 0 KTPO 0015907 18, koju je Sud zaprimio 29.11.2019. godine, a kojom je Maria Galića optužilo za izvršenje krivičnog djela Porezne utaje ili prevare iz člana 210. stav 3., a u vezi sa stavom 2. KZ BiH. Sudija za prethodno saslušanje je dana 07.12.2018. godine potvrdio navedenu optužnicu.

#### **Sporazum o priznanju krivice**

Sud je dana 20.02.2019. godine zaprimio sporazum o priznanju krivice koji je optuženi Mario Galić u prisustvu branioca, advokata Almina Dautbegovića, sklopio sa Tužilaštvom BiH dana 13.02.2019. godine.

Sporazumom je optuženi priznao krivicu za izvršenje krivičnog djela Porezne utaje ili prevare iz člana 210. stav 3., a u vezi sa stavom 2. KZ BiH, na način i u vrijeme kako je to opisano u predmetnoj optužnici Tužilaštva BiH, te pristao da mu se za navedeno djelo izrekne uvjetna osuda, tako što će se optuženom utvrditi kazna zatvora u trajanju od 11 (jedanaest) mjeseci, te istodobno odrediti da se kazna neće izvršiti ako optuženi u vremenu od 2 (dvije) godine ne učini novo kazneno djelo.

### **Razmatranje sporazuma o priznanju krivnje**

Dana 08.03.2019. godine, održano je ročište za razmatranje sporazuma o priznanju krivice.

Sud je utvrdio da je do zaključenja sporazuma došlo dobrovoljno, svjesno i sa razumijevanjem, te da postoji dovoljno dokaza o krivici optuženog. Sud je optuženom naročito skrenuo pažnju o mogućim posljedicama zaključenja sporazuma o priznanju krivnje, te je isti upoznat da ne može uložiti žalbu na krivičnopravnu sankciju ako je izrečena u skladu sa zaključenim sporazumom, da ne može uložiti žalbu protiv vrste procesa, te da mu Sud može dodjeliti troškove krivičnog postupka. Optuženi Mario Galić je pred Sudom potpuno i nedvosmisleno izjavio da se osjeća krivim za djelo koje mu je stavljeno na teret, izvršeno na način i u vrijeme navedeno u optužnici. Takođe je izjavio da u vrijeme zaključenja sporazuma na njega nije vršen pritisak da zaključi sporazum, te da je u to vrijeme, kao i u vrijeme razmatranja sporazuma o priznanju krivice, potpuno svjesno, svojom voljom, zaključio sporazum i dao izjavu o priznanju krivice. Prilikom odlučivanja Sud je ocijenio da je optuženi razumio da se sporazumom odriče prava na suđenje i da ne može uložiti žalbu na krivičnopravnu sankciju koja će mu se izreći.

Razmatrajući izjavu o priznanju krivice u skladu sa odredbom člana 231. ZKP BiH, a cijeneći pri tom dokaze koji terete optuženog, Sud je odlučio prihvatiti izjavu o priznanju krivice optuženog Maria Galića, nalazeći da je isti počinio krivično djelo Porezne utaje ili prevare iz člana 210. stav 3., u vezi sa stavom 2. KZ BiH.

### **Dokazni standard**

Standard "dovoljno dokaza", koji zakonodavac propisuje kao uslov za prihvatanje sporazuma, Sud je utvrdio na osnovu priznanja optuženog, i dokaza pobrojanih u predmetnoj optužnici, koje je optužba detaljno obrazložila, a koji su u originalu uloženi u sudski spis kako slijedi – Zapisnik o uzimanju izjave od osumnjičenog Galić Maria, UIO/UNO BiH, RC Mostar, broj: 05/4-3/III-423/2018 od 14.05.2018.godine, Zapisnik o uzimanju izjave od svjedoka, Raguž Vanja, UNIO/UNO BiH, RC Mostar, broj: 05/4-3/III-871/2018 od 22.10.2018.godine, Zapisnik o uzimanju izjave svjedoka, Planinić Ivan UNIO/UNO BiH, RC Mostar, broj: 05/4-3/III-860/2018 od 18.10.2018.godine, zapisnik o uzimanju izjave od svjedoka, Galić Tomislava, UNIO/UNO Bih RC Mostar, broj: 05/4-3/III-849/2018 od 17.10.2018.godine, Potvrda o privremenom oduzimanju predmeta – dokumentacije UIO/UNO RC Mostar, broj: 05/4-3/III-455/18 od 22.05.2018.godine, Zapisnik o privremenom oduzimanju predmeta – dokumentacije UIO/UNO RC Mostar, broj: 05/4-3/III-455-1/18 od 22.05.2018.godine, Račun „eCARD“ d.o.o. Mostar, broj: 108-X-16-1 od 29.12.2016.godine, Kartica poslovnog partnera „eCARD“ d.o.o. mostar za period 01.01. do 31.12.2016.godine, Analitička kartica partnera preduzeća „eCARD“ d.o.o. Mostar od 21.05.2018.godine za

period od 01.01. do 31.12.2017.godine, Analitička kartica partnera poduzeća „eCARD“ d.o.o. Mostar od 21.05.2018.godine za period od 01.01. do 31.12.2018.godine, Izvod otvorenih stavki poduzeća „eCARD“ d.o.o. Mostar od 31.12.2017.godine, Bilanca analitike poduzeća „eCARD“ d.o.o. Mostar za period od 01.01. do 31.12.2016.godine, Izvod iz kaznene evidencije MUP HNK – PU Mostar broj: 02-02/5-2-1565/2018 od 02.10.2018.godine.

Na uložene dokaze odbrana nije imala prigovora.

### **Krivična sankcija**

Na pretresu za izricanje krivičnopravne sankcije, iznesene su činjenice koje su od značaja za odluku Suda o prihvatljivosti krivičnopravne sankcije dogovorene predmetnim sporazumom o priznanju krivice, a stranke su saglasno izjavile da u cjelosti ostaju kod zaključenog sporazuma.

Tužilaštvo je navelo da je pri sklapanju sporazuma o priznanju krivice i prilikom predlaganja krivičnopravne sankcije imalo u vidu držanje optuženog u toku postupka, njegovo bezrezervno priznanje, te činjenicu da je svojim priznanjem pomogao tužiocu u dokazivanju predmetnog krivičnog djela. Nadalje, Tužilaštvo je kao olakšavajuću okolnost cijenilo i činjenicu da optuženi nije od ranije kažnjavao. Cijenjene su i lične okolnosti na strani optuženog, da se radi o obiteljskoj osobi kao i da je optuženi izmirio nanijetu štetu.

Odbrana je podržala razloge kojima se vodilo Tužilaštvo BiH prilikom predlaganja navedene krivične sankcije, te navela kako smatra da se radi o adekvatnom odgovoru države na ponašanje optuženog.

Nakon ocjene svih iznijetih činjenica i okolnosti, Sud je prihvatio sporazumom dogovorenu krivičnu sankciju, te je primjenom odredbi člana 39., 48., 58. i 59., u vezi sa odredbama člana 49. i 50. stav 1. tačka d) KZ BiH, za krivično djelo Porezna utaja ili prevara iz člana 210. KZ BiH, optuženom izrekao uslovnu osudu kojom se utvrđuje kazna zatvora u trajanju od 11 (jedanaest) mjeseci i istovremeno određuje da se ova kazna neće izvršiti ukoliko optuženi u roku od 2 (dvije) godine od dana pravosnažnosti presude ne počini novo krivično djelo.

Odlučujući o vrsti i visini krivične sankcije, Sud je imao u vidu odredbe krivičnog zakonodavstva Bosne i Hercegovine kojima je propisano da će se počinitelj krivičnog djela iz člana 210. stav 3. KZ BiH kazniti kaznom zatvora u trajanju od jedne do deset godina, pri tome uzimajući u obzir sve okolnosti koje su od značaja za odmjeravanje kazne i njenu individualizaciju. Sud je, cijeneći sve olakšavajuće okolnosti na strani optuženog, a posebno činjenicu da je isti u ranoj fazi postupka priznao izvršenje krivičnog djela čime je doprinjeno efikasnosti postupka, kao i da je isti iskazao spremnost da odmah vrati protupravnu imovinsku korist stečenu krivičnim djelom.

Sud je stekao uvjerenje da je izrečena kazna srazmjerna krivičnom djelu koje se stavlja optuženom na teret, te je uvjerenja da se izrečenom kaznom može omogućiti ostvarenje svrhe krivičnopravnih sankcija na način da se utiče na optuženog da ubuduće ne čini krivična djela (specijalna prevencija), te da se utiče i na ostale da ne čine krivična djela (generalna prevencija), kao i da je ista adekvatna učinjenom djelu i stepenu krivične odgovornosti optuženog.

## **Oduzimanje predmeta i imovinske koristi stečene krivičnim djelom**

Na osnovu odredbi člana 110. i 111. KZ BiH, optuženi se obavezao da plati novčani iznos srazmjernan imovinskoj koristi pribavljenoj krivičnim djelom, za radnje opisane u izreci presude, u iznosu od 58.006,00 KM.

Odbrana optuženog Mario Galića je na ročištu za razmatranje sporazuma iznijela činjenicu da je optuženi vratio protupravnu imovinsku korist u 5 (pet) rata, a u prilog ove tvrdnje dostavljeni su dokazi o prenosu novčanih sredstava<sup>1</sup>. Sud je ocijenio nedovoljnim dostavljene dokaze, smatrajući da se na temelju istih ne može sa sigurnošću utvrditi da je izvršeno vraćanje imovinske koristi stečene krivičnim djelom, te u tom pogledu obavezao optuženog da izvrši svoju obavezu povrata protupravne imovinske koristi stečene krivičnim djelo, te o tome dostavi dokaze o uplati sa svrhom postupanja u skladu sa naloženom obavezom, a koji će biti uplaćeni na račun Budžeta BiH.

## **Troškovi krivičnog postupka**

Temeljem odredbe člana 188. stav 1. ZKP BiH, optuženi se obavezuje da nadoknadi troškove krivičnog postupka, a koji se sastoje od troškova Tužilaštva u iznosu od 480,00 KM i sudskog paušala u iznosu od 100,00 KM, u roku od 30 (trideset) dana od dana pravosnažnosti ove presude.

**Zapisničar**  
**Amela Huseinbegović**

**SUDAC ZA PRETHODNO SASLUŠANJE**  
**Andelko Marijanović**

**POUKA O PRAVNOM LIJEKU:** Protiv ove presude nije dozvoljena žalba na izrečenu krivičnopravnu sankciju, niti žalba na vrstu procesa. (član 231. ZKP BiH). Iz drugih razloga propisanih Zakonom o krivičnom postupku BiH, žalba na ovu presudu može se podnijeti u roku od 15 dana od dana dostavljanja pismenog otpravka presude.

---

<sup>1</sup> Rješenje o prenosu novčanih sredstava Regionalnog centra Mostar broj 02/6-2/III-16-16-101-2931-3-2/18 od 01.10.2018. godine, Rješenje o prenosu novčanih sredstava Regionalnog centra Mostar broj 02/6-2/III-16-16-101-2931-3-1/18 od 07.08.2018. godine, Rješenje o prenosu novčanih sredstava Regionalnog centra Mostar broj 02/6-2/III-16-16-101-2931-3-5/18 od 22.01.2019. godine, Rješenje o prenosu novčanih sredstava Regionalnog centra Mostar broj 02/6-2/III-16-16-101-2931-3-4/18 od 29.11.2019. godine